

Մ Ա Մ Ո Ւ Լ

Անցեալները նկատեցինք, որ գրերի գիւտի 1500 և տպագրութեան 400-ամեակի շուրջը ծագած վէճի առթիւ գաւառն էլ է արձագանգ տալիս, գաւառում ևս բողոքում են էջմիածնի անտեղի ու փաստակար ինքնիշխութեան դէմ: Երևանում հրատարակող «Կոտն» շաբաթաթերթի խիստ կարծիքը էջմիածնի ոտնձգութիւնների դէմ մեր ընթերցողներին արդէն յայտնի է. այսօր էլ «Ղարաբաղը» իր № 57-ի առաջնորդողում քննութեան առնելով նոյն հարցը գտնում է.

«որ Տփխիսի յանձնաժողովի որոշումը կամայական չէ, այլ հիմնւած է պատմական փաստի վրայ. ամբողջ հայութիւնը թող գիտակցէ. որ իր կուլտուրական գոյութեամբ պարտական է նոյեմբերի 28-ին կատարւած մեծ գիւտին»:

Ապա մեղմ կերպով, նոյնիսկ գուրջւած նկատում է, որ էջմիածինը միայն «խիստ պաշտօնական բնաւորութիւն է տալիս տօնին և զրկում է նրան համազգային և շքեղ լինելուց» և ուրիշ ոչինչ:

Անշուշտ տօնի բնաւորութիւնը «պաշտօնական» է լինելու. սակայն «էջմիածնի ինքնագլխութիւնն է», որ պաշտօնական չպիտի լինի. ահա թէ ինչ է մոռանում կամ աւելի շուտ մոռացութեան տալիս «Ղարաբաղ»-ը, որ չպիտի անէր:

Այնուհետև «Ղարաբաղը» ևս ճիշտ եզրակացութեան է յանգում գրելով:

«Ցանկալի է միանգամայն, որ Տփխիսի և էջմիածնի միջև ծագած թեր և դէմ կարծիքները, ինչպէս և պառակտող ոյժերը, ջլատող տարածայնութիւնները վերանային ընդմիշտ, իսկ դպրոցական և գրական ֆօնդերը շողկապէին իրար հետ այնպէս, ինչպէս գրերի գիւտի 1500-ամեակը և տպագրութեան 400-ամեակը:

Լաւ կը լինէր, որ մեր գաւառական միւս թերթերը ևս արտայայտէին այս խնդրի առթիւ:

* * *

Թաւրիզում հրատարակող «Միտք» շաբաթաթերթի № 21-ն է մեր ձեռքում. շատ ծանր տպաւորութիւն է թողնում. ինչ որ սխոլաստիկ, նեղ, միտումաւոր և որ գլխաւորն է, անբարեխիղճ վերաբերմունք էք տեսնում շօշափած խնդիրների ու հարցերի վերաբերմամբ: Թաւրիզի պէս մի տեղ, ուր հնարաւորութիւն կայ էլ աւելի ազատ մտածելու, քան թէ արտատրպութիւն անել թիֆլիզում հրատարակող կղերական «Հովիտից», իսկապէս որ նման թերթի գոյութիւն միայն անկեղծ ցաւ կարող է պատճառել: